

Contact Numbers pawimaw :
DC/CCPur : 03874-234234
SP/CCPur : 03874-236747
Police Station : 03874-202248
SP Control Room: 03874-233239
Dist. Hospital Casualty : 03874-233370
Fire Brigade : 8974 147 799/
8258 057 887 / 8974 103 600
SP Hotline Number
7085-256-377



Hmasawanna Thar

(A N I N D E P E N D E N T D A I L Y N E W S P A P E R)

Regd. No. RNI - 40917/89 | Postal Regd. No. MNP - 67



Little Miss Universe ah India ram ata win Padmalaya Nanda-24

Hmasawanna Thar Vol - 32/219

Churachandpur

email : hmasawnnatharnews@yahoo.com

Phone: +91-3874-236846

Rs 6/- per copy

English Worship Service hawng



CCPUR: Rayburn High School le Rayburn College hmalaknain zani zantieng 2:30PM khan Rayburn Chapel hmunah Kohran pawl bik um loa saptawnga Pathien biek inkhawmna Rayburn English Worship Service hawng a nih.

English Worship Service hi Rev. Stephen Chinzathang, Senior Executive Secretary, ZPCS le Vice President, North East

India Christian Council in a hawng a, tawngtainaa inhlan na ngei nghal baw. Rev. Khen P. Tombing, Chief Coordinator, PCI (R) le Principal Rayburn College hmunah, Kohran pawl bik um loa student hai ta dinga Pathien biek inkhawmna dinga worship service hi hawng a ni thu a hril a, Pathienni zantieng 2:00PM zatin Worship Service hi a um hlak ding a nih.

Hmar Writers' Club-in May 31 ah Hunser Buotsai

CCPUR: Hmar Writers' Club (HWC), Headquarters, Churachandpur chun a lo rel tah angin, an member chanpui le Treasurer chel zing laia ni kum June thlaa fam lo chang tah, Zoram khawvêl literature huonga thaw hlawk tak, khawvêla a um ngai thak lo tribal nunphung besana Western (Cowboy) comics, Laisaizawk's SUDDEN MUANGA siemtu Pu Lalsangzuala chawimawina le ngaiat suklangna hunser, May 31 (Nilaini) dar 1:00pm khin HWC President Prof. L. Kiemlo Pulamte In, Peace

Lane ah nei an tum. Member hai po po kim taka thang seng ding le zantieng thlai theing awt tlâng nghâl dinga hung inbuotsai dingin Secretary Mr. Joseph Joute-in inhrietirma a siem a. A hrana inhrietirma siem a ni ta naw khawma chanchinua inhrietirma hi official anga pawma ngai pawimaw seng dingin a ngên ngâl baw. Pu Lalsangzuala a lo um ta naw leini a nuhmei Pi Laldinsangi kuomah Chawimawina Certificate chawna a ni ding niin chanchin ei lo hriet.

HWA GHQ Election June 3-ah nei ding

CCPUR: Hmar Women Association (HWA) GHQ Executive Meeting thurel angin kum 2017-2010 (kum 3) sunga Hmar Women Association GHQ thuoitu ding thlangna chu June 3, 2017, 10:30AM a inthawk khin Muolvaipei Community Hall, CCPur hmunah nei ning a tih.

Hi inthlangna ding le inzawma palai-a thang ding hai chun kum 2016 chena membership fee Headquarter-ah an peklut

ngei tul a ta, Membership fee pelo hai chun candidate/vote nei thei nuh hai tiin HWA GHQ chun inhrietirma a siem. Chun, Inthlangna hi HWA Constitution dungzua nei ning a ta, Palai intir dan ding chu-Article 7. Clause II (e&F) dungzui ning a ta, inthlang dan chu Article 8, Clause I (a-f) dungzui le palai ding hai chu mani Unit tinin kalman an tum ding ti a ni baw.

CHANCHIN LAKTAWI Rukru pakhat man

CCPUR: May 28, 2017 zantieng 5:30PM khan Sietmal Christian Hr. Sec. School compound sunga School hmangruo Iron bar/rod 16mm pahni inru tum Mr Khaikholen @ Len chu a thil inruk lai ngei man a ni a, School thuneit han Sietmal Welfare Committee kuta an pekdaw angin SWC in thu indawna an nei le zilna pek a ni nhungin Bijang Youth Club, TKSU GHQ thuoitu-hai le a sungai kuoma thuoiti an kutah an inhlan. SWC chun a lo thaw dan pangngai angin counseling an pek nhungin tawngtainain an inthla a nih. (SWC)

HI GHQ Special Assembly thurel thenkhat

CCPUR: May 26, 2017 khan LJ Memorial Hall, JJ Plaza, Rengkai Road, CCPur hmuna Hmar Inpui GHQ Special Assembly nei a ni a, chu huna thurel le resolution iemanizat passed a ni a, chu laia thenkhat chu a hnuoia ang hi a nih. Constitution Amendment chungchang General Assembly nawk huna a tul anga ngaituo ding; Hmar Welfare Fund dawl dan chungthuah HI

GHQ Finance Committee in effective lem dan ding ngaituo hma a nasa lema a lakzawm pei ding ti a nih. Hmar Martyrs day inser dan le Martyrs list chungthua thulut chungthuah chun, a hmun/location dungzua hmang remchang dan ang peia inser hlak a ni anging Martyrs list a hrana siem loin Hmar hnam cause a hringna inhlan popo hai general in huom hmaka la fepui nisien ti a nih. Hnam

GAS NEWS

Agency : SAS
Booking : 4th. FEB., 2017 to 4th. March., 2017
Delivery: 29-05-2017 (MON)
Time : 9AM-till stock
STOCK : 252 / rate: Rs. 784
First come first serve

GAS NEWS

VANGSEI INDAANE K. Saibung
Booking : 20-04-2017 to 22-04-2017
Delivery: 29-05-2017 (MON)
Time : 9AM-till stock
STOCK : 306

Hmunhnawk dehawn dân thalem hmang ni tang a tih: PM World Environment Day-a inthawk khawpui-ah Dustbin 4000 hmang tan ding

NEW DELHI: Thienghlamna le faina tieng hma ei sawn theina ding le ei khawpuihai hmunhnawk sukfai an ni theina dingin World Environment Day June 5 a inthawkin sawrkâr thlungpui chun hmunhnawk inthiefaina runpui a tan ding niin Prime Minister Mr Narendra Modi chun a hril.



All India Radio hmanga India mipuihai kuoma thu a hrilna "Mann Ki Baat" a chun, "June 5 khin khawpui 4, 000 haiah hmunhnawk inthiefaina ding Dustbin rawng chi hni, a hring (Green) le pawl (Blue) hmang tan ning a ta. Dustbin pawl-ah hmunhnawk t awlhai lakkhawm/sie ning an ta, a hring ah hmunhnawk hnawng/tuihnang (liquid) lakkhawm/sie ning an tih. Choka hmunhnawkhai reng reng chu liquid an ni chun Dustbin hringa sie ding an nih. Hieng hmunhnawkhai hi hnuoi thatnaa hmang thei an nih. Hmunhnawk hmang hi thil tangkai tak

tin fur hmang sawrkârin thingkung maktauoil tel a phun zie a nih tiin a hril baw. Mi tin hi campaign-a thang dingin a fiel baw.

Prime Minister chun, United Nations chun tu kuma World Environment Day thupui dingin "Connecting People to Nature" ti a thlang a. "Connecting with nature" ti umzie chu khawvêl thalem, hring lem siem a nih" tiin, Mahatma Gandhi tawngbau 'Miin khawvêl a hmu tah lo ding chu a ngai pawimaw ding a nih' tiin a hril a. Khawvel huopa environment campaign hi mimal taka lak seng ding a ni thu le, kum

aknain campaign thawin hmunhnawkhai inthiefai a ni a. Chawlikar 80-90 sungin Beach po po chu inthiefai vawng a ni a. UNO Environment Program chun Mr Shah hi "Champion of the Earth" Award an hlan nghe nghe niin a hril.

Thienghlamna le faina dinga hmalakna "Clean India" tuol le khawlaia inhnawm a sukbona dinga hmalaknaah, J & K - A Reasi Block khawm, abikin nuhmeihai hmalaknaa zarin tuhin chu khawlaia inhnawm (open defecation) a um tanaw niin a hril. Nuhmeihai in tina fea campaign an neina ra a nih.

Mr Modi chun taksa hriselna dinga tha Yoga hi India-in khawvêla a contribute a ni a. Hriselna ding le stress sukhlawmna dingin a tha lein tamtakin sungkua thang thumhai a ruola Yoga thaw an hung rawt a. International Day of Yoga kum thum tlingnaa hin thang thumhai Yoga thawna kuma puong el dim a nih tiin a hril.

Sungkuo tin chu pa, nau le tuhai Yoga thaw tlâng ding le an thlalâk Narendra Modi App ah thawn dingin a ngên tâwl a. June a inthawka June 21 chen khi Twitter ah Yoga thu a ziek ding niin a hril baw.

Prime Minister chun, sawrkâr chu a mipuihai lakah ringum takin, a sinthaw hai khawm a puong/ tlangzar pei ding a nih tiin, kum thum sũnga a sawrkâr hmalakna le sinthaw ra hai chu media haiin ni 15 liemta a inthawk khan nasatakin an lo puongdar zing tah niin a hril. Hieng thaw hi a hrilina a tha a. Thatna

dinga insawisel (constructive criticism) hai dam hi democracy ah chu hmasawna dinga thatak hmangruo an ni thu a hril baw. Indem nekîn thil siemthatna dinga insawisel hi uor lem ding a ni a. Chu chu chingdan tha le hrisel a nih tiin, sawrkarin thaw ding tha a la thaw naw hriet neihai chun ei ram hmasawna dingin hung hril pei dingin a ngên baw.

"Mann Ki Baat" thua lekhabu siema um tlangzarna dinga President, Vice President le Lok Sabha Speaker hai an hung thang lein lâwmthu a hril a. Muslim hai Ramzan thla le inzawmin mipuihai chibai a buk a. Taksa le thlaraw inthang ruol hi thil pawimawtak a nih tiin a hril a. India ram pahaiin hnam tin chi tin lungruol taka ei khawsak theina ding ram le danhai an lo siem hi India mipui vaibelsie 1.25 hai hamthatna le lung lawmna ding chu a nih tiin a hril.

Health Minister-in Senapati Dist. Hospital a Sir

IMPHAL: Health & Family Welfare minister Mr L. Jayantakumar inrawina hnuoia ministerial team chun ni hni sung aw ding inspection thawin Senapati District Hospital le hmun hrân hrânhai an va sir. Ministerial team member danghai chu TD & Fisheries minister Mr N. Kaysii le PHED minister Mr L. Dikho hai an nih.



Health minister chun Hospital sung le puo, hmangruohai po po a en vawnga thawktu doctor le nurse hai le an inbieknaa chun, Senapati District Hospital hin Manipur a hospital thatak ni thei dingin hman-

gruo thahai chu a nei kim deu vawng a. Amiruok-chu, hieng hmangruo to tak takhai hmang lova an um tâwp el hi chu thil tha an naw thu a hril pek.

Doctor le nurse hai chu thei tawpa taimak insuoa thafan taka sin thaw ding le hmangruohai khâwm a tang-kai thei ang taka hmang dinga hrilin, a tul ang ang chu sawrkarin a pek sa ding niin a hril. Hospital hin sawntawte ah Trauma Centre, Burn Care Centre le Water Supply System a nei vat tah ding

nia hrilin, doktor le nurse le thawktuhai chu sawrkâr a beisei anga sin thaw seng dingin an fui tâwl baw.

Pathienni chawnhung khan Maram Bazar kawl, Tatomei-a Nursing College bawl meka um le PHC, Sholitokhu, Mao-Maram Block hai bakah PHC Maram le Tadubi khâwm an sira. Tulai hnaia CHC National Award dawngtu Mao CHC khawm an va sir.

Hi zo hin PHSC, Pinanamei, Mao kawla mi khâwm a va en a, a tawpna takah PHSC Kanglatombi le PHC Sekmai le Khurkhal hai khawm an va sir baw.

Minister-in Thoubal College a enfel

IMPHAL: Education minister le Heirok biel MLA Mr Th Radheshyam chun Pathienni khan Thoubal College a va sir a. Chu zoah a beil Heirok a vadung tuilien phaa harsatna intun hlaktu umdanhai siemthat thei dan lampui a um am tiin a va kan baw.

Minister chun Thoubal College sung umdân le hmangruo (infrastructure) a nei zathai enin compound hai khawm sir kuol vawng baw.

Minister hin a beil Heirok Vadung sukfaina sin le a vakam banghai a pangngaia siem nâwkna dinga sin thawlai mekhai a va kan baw.

Heirok vadung hi ni dang chu tui a hratin a tha thei em em a. Fur lai lem chu a let zing zing hlak a. Tui kang laia vadung lung le phaiphin ruta riek lut hlakhai chu tui hung lienin a sukseit teu teu hlak a. Vadung lung le phaiphin lak nasat taluo leia vadung tuong inthuk taluo lei khawm hin tui luong dan a sukdamlang pha tha niin mipuihai chun an hril.

Vadung humhalna ding le siemthatna dingin Bull Dozer le JCB hmanga sin thaw mek a nih.

PLA cadre pakhat man



IMPHAL: Zani zantin dar 7:30 vel khan Imphal East Police Commando han B. Lungthang Vaiphei, OC, CDO, Imphal

East inrawinain New Checkon hmunah dappui an thaw a, ATM booth bul lai PLA cadre Nahakpam Churchill @ Naobi (32), s/o N. Khelendro Singh of Kongba Bazar an man a, Porompat Police station-ah an peklut. Mana um pa hin PLA a bomb kamtu pawla thang hlak a ni thu an puong niin ei thu dawngna chun a hril.

Nupa tuokkhat Police han an man



IMPHAL: Zani zantieng dar 4:30 vel khan R.K.Madhusana(45) of Singamei Wangma Kshetri Leikai le a nuhmei hai chu Imphal est Police han an man a, thu indawn chiengna an nei mek. Madhusana hin nuhmei pahni a nei a, a thaikem nu R.K (Ongbi)

PG Course inchuk nuomhai ta dingin

IMPHAL: JNIMS, Porompat, Imphal-ah Post Graduate inchuk nuomhai ta dingin hnina lekha wawisun 4PM chena la peklut thei dinga hun suksei a nih. Post Graduate inchuk theina hai chu

MD Anatomy/Biochemistry/Forensic Medicine/Microbiology/Pharmacology/Physiology hai an nih. Counselling chu May 30, 2017 11AM a inthawk Council Room-ah nei ning a tih.

Electoral I-Card pelut dingin

IMPHAL: Passport hnina lekha chingfel lo tam tak Manipur Police Department hnuoia CID(SB) Section-ah an tang mek a. Verification thawna dingin Electoral Identity Card a tul a, hi lei

hin passport hni, la sukfel lo hai chun an hmatieng CID(SB) Office, Imphal-ah Electoral Identity Card va pelut dingin CID(SB) Verification Section chun inhrietirma an siem

Pasal pakhat kap hlum nawk

MOREH: May 27, 2017 zan dar 9:30 vel khan tu ti hrietlo han Amute(38) of Namphalong Ward No.13 chu a in sungah an va kap hlum bakah a nuhmei le an nauan an kap hliem a, Tamu Civil Hospital,

Myanmar panpi an nih. Tulai hnai el khawm khan Namphalong bula Moreh town sunga Premnagar Bazar-ah nupui pakhat kap hlum a nih. Ieng leia kap hlum am ti tuchen hin hriet a la ni nawh

Mizoram mi tlangval pahni Guwahati-ah a thisaa hmu an nih

GUWAHATI: Assam- a Guwahati hmuna lekha inchuk Lunglei, Lunglei Electric Veng (Mizoram) tlangval pahni -Lalhman-gaishanga s/o Chawng-hranga (24) le Lalmsawma (24) s/o Chawngsanga (L) hai chu a thisaa hmu an nih. Lalhman-gaishanga hi a ban le a ke ru a tliek a, Lalmsawma hi a nakawra inthawk thisen a suok baw nia hril a ni a, an pahni hin Assam Down- ton University-a Technician inchuk an ni a, Lalhman-gaishanga hi Dylisis inchuk le Lalmsawma hi

Physiotherapy inchuk a nih tiin ei thu dawngna chun a hril.

Ei thu dawngnain a hril danin hieng tlangval pahni hai hi North East Rural Livelihood Project (NERLP) fethlenga Skill Development hnuoia technician training an ni a. Inrinni zantienga kha tui insil dinga ruok an ni a, anni ruol hin Mizo pasal iemanizat khawm an suok ve a, sienkhwam anni hi Hostel tieng la kir thleng nghal lovin Hostel bula dawte pakhatan an la chambang a, hmu an ni

nunhng tak chu zani hmasa zan dar 9 vel kha a ni a, chu hnung chu an chanchin hriet zui ta loa um le zani zingkar dar 4 vela kha an ruong hi hmuu um a nih. Police chun an ruong hi Gauhati Medical College Hospital-ah post-mortem an thaw nghal a, Mizoram

House-ah inthlana nei a ni zoim Guwahati Mizo Welfare fethleng an ruong hi Mizoram panpui a nih.

Hieng tlangval pahni hai thina tha hin MZP chun thusuok siemîn, thina tuok sungkuo hai an sun thu an puong a, anni changsuol leia thi ni loin misuol kut tuora thi an ngei ngei an ring thu MZP chun an hril. Tuolthattu hai chu mana an phutawk hremna pe ngei dingin an ngen bakah thina tuok sungkuo hai zangnadawmna pe dingin sawrkâr thuneituhai an ngen.

IMPHAL: Kum 2017-19 sunga All Tribal Students' Union (ATSUM) officials ding thlangna zanikhan Imphal hmuna nei a ni a, officials dingin hieng a hnuoia hai hi thlang an nih.

ASSEMBLY AFFAIRS
Speaker - Emboi Serto ; Dy. Speaker - Marahang; Secretary - Joiningam SR; Dy. Secretary - Moia Hmar
EXECUTIVES
President - Vareyo Shatsang; Vice President - Vishoule Pou General Secretary - Seiboi Haokip; Asst. Gen. Secy. - Gengen Vaiphei; Finance Secretary - SR Andrea
SECRETARIES
Education - Henkai Singsit ; Jt. Secy. - Lovejoy Shimrah; Social & Culture - Kakam Haokip; Info & Publicity - Micah Kamei; Rights & Reservation - Gaisingam Gonmei; Sports - Lamcha Chongloi; Asst. Sports - Villain Aimol; Legal - Shimthar Jajo; Forest & Env. - Mangminthang Zou; Asst. F&E - Marangkhai
TRIBUNAL BOARD
Mr. Joseph R Hmar – Tribunal General; Mr. Maun Tombing - Member; Mr. Adani David Choro - Member

VAWISUN THUPUI

Vanah, hangthim le tuiekin a fak siet nawnaah, rukruhan an verpawpa an inruk nawna a chum, in ta dingin rohah siekhawl lem ro; I ro umna taphawtah i lungril khawm um a tih.

- Mathai 6:20-21

Editorial

Ramngaw le ramsa hai humhal

Mihriemhai, ramngaw le ramsa hai hi khawvela um dinga Pathien siem ei ni a. mihriem han ramngaw le ramsa hai ei that le sukchereu hin a tuortu chu ei ni mihriemhai tho hi ei nih. Hi chungchang hi ei inhrii ngunin iemani chenah ei hriet ve ta vieu ta a, sienkhawm Manipur hi State danghai nekin sik le sa inhawilem ei la nei thei leini ei la lungmuong a, ei lan vawi zo tak tak naw niin an lang. India rama State thenkhat haia chun khawlum taluo tuorzo naw leini kum tin mi thahnemtaww tak an thi hlak. Borook le khawlum taluo leia thina tuok em ei la um naw leini ei vangei hle.

Ramngaw ei sukchereu leia tuta ei harsatna tuok mek pakhat chu tuinhri hi a nih. Tuihnar mi petu ramngaw ei sukchereu nasat leini tuhin chu tu-ichawi le tui lakna tiengpangah harsatna nasatak ei tuok mek. Tuta hmaa vadungte tui thienghim tak humuntin deuthawa um hlak kha tuhin chu hmu ding a tlawm ta hle, a bo tep tep taww ta a nih. Ei tui hmu sun khawm nasa taka sukthienghim chawp ngai an ni ta a, tui thienghimlo dawn leini tuta inthawka natna hri (water borne diseases) hi ei ramah natna tlanglawn tak a hung ni tah. Tuta hma khan tlangrama vadungte tuihai kha khuloizinhai dawn le ring tak a ni a, tulai ang em emin hiengang natna hri hi la um ngai nawh.

Sik le sa a hung inthlakthleng a. Ruotui a hung tla tan a, ei tui dawn hai a thienghim taww naw lei ni ngei a ta, naute damnaw an tam hle a, District Hospital, Churachandpur a Children's Ward chu a lun hle a, damnaw khum an indai nawh. Naute damnawhai hi khawsik, ekkhaw, inluok le pangsa an ni tlangpui. Hieng a ni lei hin fak le dawn thilah mitin fimkhar hle ding a nih. Insuma dam le hrisel thei a nih.

Ramngaw hi mihriemhai sukchereu el khelah hmasawna ei dit leini ramngaw ei suksiet naw theinaw a, ei ram chu ramngaw nekin phulin a hung inching ta pei a nih. Motor lamlien, farm, industry le power project hai thawna ding in ei ramngawhai ei suksiet a, hmatiennga hun la hung um pei dingah ei la thawhlain ei la hung tuorzo naw ding niin an lang. Hmasawna ei zawng le ei thaw danah hin a chintaww ei hriet a tul. Chintaww ei nein aw chun, chu ei hmasawna chu kxing tiengpangah harsatna a mi siem naww tho chun, ei hmasawna chu hmasawna ditum ni thei naw nih. Tipaimukh dam thaw dinga ti khawm hi a thatna le that nawna a um a, a thatnawna ding hrechiungtu han nasa takin a dodal el a ni hi!

Tui khuop annawleh tuiting (Dam siem) hin sik le sa nasa takin a sawidanglam thei a nih ti chu thudiki a nih. Khuga Dam Project a hung uma inthawka Tuihapui vadung le a kam le a se vel haia boruok hung lum suol dan le boruok hung inthlak danglam dana inthaww hin ei hrietchieng taww hle ring a um. Churachandpur Town le a se vel boruok ngei khawm hi nasa takin a hung lum suol el, thil lum khawm a hung hrang tan ta a nih. Tuta hma khan Churachandpur-ah thil lum a hrang ve ngai nawh.

Ramngaw humhal a tul ang bawkin ei rama ramsahai khawm humhal an tulain a pawimaw hle a nih. Ramngaw ei humhal chun ramsahai ei humhal thei ding tina a nih. Hi lei hin ram raw hi bansan hmak ding a nih. Ei rama ramsa le vate chitnreng, ei ram sukrawitu hai chu hmu ding an vang ta khawp el. Hi thil hi an umna, an chengna le fakzawngna hmun ei cukchereu pek lei a nih. Ei ramah ramngaw nidang lai angin hung um naww thei ngat sienla chu ramsahai hi ei ramah an hungkir naww ngei ring a um. An thu le hla lovin ei hnaww hmang an nih.

Table with 3 columns: Hours, Studio, Programme. ALL INDIA RADIO: CHURACHANDPUR PROGRAMME. Date: May 29, 2017 (Thawtanni). TRANSMISSION- FM-101.4 Megahertz.

Editorial Board Lalmalsawm Sellate: Editor & Publisher Roding L. Sellate: Jt. Editor Joseph Joute: Freelance Lalsansuok Pulamte & Samuel Zothanglien@SZ Zote: Sports Lalruotlien Duien: Computer Assistant Edited & Published by Lalmalsawm Sellate at HT Office, Lighthouse Lane, Churachandpur and Printed by him at Lamka Super Printer, Vengnuam, Hiangtam Lamka, CCPur, Manipur.

CHELFUNG

By: L.Keivom

Dam lai khaulzinna suk le tung, vawi le chang, hmung le hma, tlak siet le tluk siet theina tam tak kara him tak le hlawtling taka tum ram pana kal tluong tak le ngil taka chawi theina dinga pawimaw pakhat chu chelfung nghet tak nei a ni ka ring. Ram thuoitu ngirhmun cheltuhai ta ding lem chun a pawimaw suol.

Hi ngirhmun ei hril hi May 9-a President Donald Trump-in Federal Bureau of Investigation (FBI) Director James Comey a ban na le inzawma kum 1971-a muol lo liem tah, theulawzin (theologian) inlar Reinhold Niebuhr ngaidan 'Christian Realism' ti chuh America ram thuoitu tam takin thutlukna an siem dinga chelbana an lo hmang nasatie thu chanchin suitsu le dilsuttuhaiin an hung phaww lang chu a nih.

March khan Gizmodo reporter Ashley Feignberg chun Instagram le Twitter account-a 'Reinhold Niebuhr' ti hmung lem hmanga ziek hlaktu chu tu am a ni ding ti zawng suok tumin a sui a. Pangpalh thil deuthaw-in FBI Director ni lai James Comey a ni thu a hmu suok a. Ama hin College of William and Mary-ah a kai lain undergraduate thesis-a dingin Niebuhr theulawzi a ziek a. 9/11 ti-a hriet, kum 2001 September 11-a firfiek ruolin New York-a 'Twin Towers' an bomb hmung khan, hieng ang inrikrapna hi do rem dingin 'I bieng bentu chu kxing tieng khawm dawpek rawh' ti thukhawchang ringawt hmanga indawrpui chi an ni nazwie chu thil chieng sa a ni a. Ieng hmangruo le tharum am hmanga tukdawl ding ti zawna a tak ngeia khawvelin a hung hmasuon hmung chun Niebuhr theulawzi, 'Christian Realism' ti chuh a hung pawimaw suol tah a nih.

9/11 hma daiha inthaww khan James Comey chu Niebuhr theulawzi-a lo inhnik tah a ni thu New York Magazine-in an interviewi khawmin a lo hril ta a. FBI a zawm san khawm rorelna indik le fel hmanga khawvela hmangaina inluongtir a nih. Niebuhr hun laia kristien theulawzin tam takin khawvela harsatna hne dan dinga an ngai chu hmangaina kut hmang a nih. Niebuhr ngaidan ruok chu a ni nawh. Hmangaina leia mihriem intanna dinga Isu inhlanna chu mihai kuoma inentir dingin mihriema huomhpnain a hlao hlak leini, rorelna indik hmanga khawvela hmangaina tui inluongtir ding ni lemin a ngai. Indikna hmaww cheltu ding rorelii tha indin suok chu kristien taphaww thil tum ni dingah a ngai leini, a theina hmun taphaww kristienhai chu pawlitiks huongah inchwam lut dingah a ngai. Chu ngaidan le eimi lai kohran ngaidan chu sim le hmar ang a nih. Kohrana inhmanghai chun pawlitiks chu taww thieng loa ei ngai. Khawwlang thil hril hril laka khawm inthier fiilim dinga ngai a um baww.

Ieng leia Niebuhr hin 'Washington's favorite theologian' ti hlaw hiel khawpa ngirhmun insang a chang am ning a ta? President Jimmy Carter chun niukliar ralthuom hmanga indo el theina ngirhmun a ngir lai chun, "Ka ngaituonaah Niebuhr a chhm zing" a ti hiel a. President Barack Obama khawmin ram dang le an indawmaah Niebuhr filawsawfi hi a mang tangkai hlein a hril. Chu taka a thlungpui tak chu 'Christian Realism' a nih. Mihriema chapona hin khawvel tha lem indin tuma thang lakna hi a suksuk thei niin a ngai a. Thil insang lru le famkin thaw dinga insie nekin, a taka thil hlen thei china mit inlen le chu chu hmun thawin lukhawng a nei lemin a ngai. Chun, thil tha lo amanih suol amanih inthiel fai rawt thei dinga inringna hi nei ngai lo ding le thil tha thaw tumna luotah an chapona lungril hrik thlaa sietna nasa tak an inlung nawna dinga fimkhar taka inveng zing dingin a'n fui lem a nih.

Rorelna indik hmangin, Zion chu intlan suok ka ta, A sunga cheng suol simhai chu, Felnain san suok ka tih. Mi hel le suolhai ruok chu, Suksiet ni ve veng an ta, LALPA nghatsantuhai khawm, Sukbohmaning um an tih

ti-a zawlnei Isaiin a lo hril ang khan (1:27-28), rorelna indik lak lut a ni theina ding chun indo a tul leh indo, tharum hmang a tul leh hmang, inremsiem a tul leh inremsiem, inphahnuoi a ngai leh inphahnuoi hi tak ram le inzawm niin Niebuhr chun a ngai baww. A tleiraww laia pau khalo lo le intim dak hlak kha rorelna indik suol suokna ding a ni phaww chun huoi takin awm a hung daw suok ngam a, America-in Hitler tukdawl dinga Indopui Pahinna an chaww lum tsi le a huonga Soviet Union le an hung inmel rum khang tlang taka an sawrkar pawlitiks tum a nih.

Chuong chu a ni laiin, Communist indar zau pei ding dang tumna anga inhrila Vietnam War-a America a kul a taa a thang kha 'Moral Majority' indintu, television avangelists an ti laia pakhat Jerry Falwell, ieng lai khawma Republican Party awntu le anni laka hamthatna tam tak dawnga insukhausa hai rawiin uolau taka an tan lain, Niebuhr chun America thilthaw chu indika a hriet naw leini nasa takin a kal tung a nih.

America vangeina pakhat chu a tha le a tha naw indaizai khawp an um kha a nih. Kristiena ngaihai lai khawm mawl taka ring le zawm tui an um a; kristiena ngai ni zing, inkhawm ta lo, Baibil tiem ta lo, Kristmas, Good Friday & Easter Sunday nikhuoa inkhawm zeu zeu chaww pawl an um baww a. Chun, a lem khawma kristien inti nuom ta lo tam tak an um baww a. 'Thahnemngai taka rawngbawl an um lainin sumdawngnaa hmang, abikin television evangelists inthai lai hin, an tam suol a. Innei si loa nuhmei-pasal um hmunkhat an tam a. Innea inthe, innei nawka inthe nawk an tam baww a. Piengthar inthai lai innak le inthe a hlour tak. An biekk tak chu zalenna a nih. Khawvelin a hriet thil tha le thil tha loin bu a khuorma ram, God Bless America a nih.

Ei hriet seng angin November 2016-a Presidential Election-ah pa dangdai tak el, hausa tawntaw, kha hmaa inthlanga lo ngir tah le hnawla um, pa ti phel phul, iemani kawng zawnga chu Pu Sura sangpa ni awm taka inlang, sumdawngnaa tieng ruok chu Nahai let tama dawha nei, a khingpui Hillary Clinton leh Debate an nei tum khawma vahrit le chepa buk anga inkhan lo deua mi ngai, mi tin deuthawin tling chu Hillary chana an sie, sienkhawm a rama mi naranhai so inphut dan them fu them. Republica Party kandidat Donald Trump chun kum li sung khawvela President po po laia thilthawthei tak lalthungpa a hung hlou tah a nih. Maktiin khawvel a kahak a, a meng phawk a, mit ar-inpa pumin ieng tin tawpin am a hung che ding tiin an thlir thup el a nih. Bill Clinton hmel an hmu nuom dan le Donald Trump hmel an lawm dan hi ziek fe tham niin ka hriet. Trump hin thu mak le dangdai hril suok phut dinga ringna miin an nei tlangpui a hawi. Lawm a hlaw dan khawm hi a Thawthawng tieng deuin a fe a hawi. Pa ropui a nih.

Thlang tlinga a um chun a thaw ngei dinga thu a lo tiemhai chu ahmatiemna thaw dingin hma a lak ngal zung a. A thaw ngam tak tak khawm an ring naw khaw, Muslim ram hrang hrang pasari-a inthawka USA-a lut khapna thu a hang puong kha chuh a tla na khawp el. Court-in dang naw sien chuh, a kakhaww raphlak ngawt a tih. Chuong sa khawm chun nghawng a nei nasa. Amiruokchu, ram danga a'n zin suok hmasa taka a sir chu, a hmaa mihaiin an la thaw ngai lo, Islam piengna ram, Saudi Arabia a nih. Firfiekhai nasa taka do tlang dingin thu an thlung.

A thilthaw laia mak pakhat chu FBI Director James Comey a ban kha a nih. Comey hi Hillary Clinton-in Secretary of State a ni laia mi thaw dan naw anga sawrkar thila indawma po poa ding khawma a Private Mail Account a hmang el khan sawrkar pawl ieng am a taww ti enfietu dinga ruot a ni a. Hillary lem chun hi thil hi a tling nawna san

bulpuia a ngai hiel a nih. Chun, inthlang lai khan Russia Sawrkarin Donald Trump ta dinga kut hung rawl anga intumna a um leiin, President Obama chun a hun tawp ruoiah America-a inthawkin Russian Ambassador le diplomats 35 zet hnaww suokna thu a puong hiel a ni khah. Inthlanga Russia kut rawl dan suitu dingin James Comey baww hi ruot a ni a. Ama hi pa indik, thudik ngaina mi le tan tlat mi a ni leia Donald Trump-in a ti thawng a, a ban ni dinga ring an tam. Isaiin lengkim LALPA thu a puong anga rorelna indikin hmun a chang pha chun, iengkim fie takin la hung inlang dingin beisei inla.

A mik a mak ei man theina dingin America khawvel (abikin USA) zuk thlir vuot inla. Europe ram hrang hranga inthawka Amerika khawmuolpuia inpem hmasahai laia tam tak chu Roman Catholic neksawma nghawka ram thara inpem, Protestant pawla mi an nih. Anni rawi lai hin a fir zuol, insuksakhawmi deu el, 'Puritan' inti pawl an um a, sim tieng an tla khawm rawn a, sala midum ruol an man khawm sawra loneina tiengna inhmang nasa, President Abraham Lincoln hun laia salsuokna thu a puong leia hel (American Civil War) le indang tum, sala midum (back slave) kaww chu mingo an ni sung chun a suolna le Pathien thu le inkalna hre nuom der lo an nih. Hienghai pawl le mihriem chanvo le zalenna suol suok nuomtu pawl chu Republican Party le Democratic Party tieng awn mi an la ni deuh vavng chu tie! Democratic Party chu Pathien ngaisak lo, khauphar thawvenga thawveng nuom pawl inbuk khawmna niin an ngai tlangpui. Hang hril fie ngiel tum inla khawm, an ngirhmun insaww chu mani sakhuo inphatsan tluk hieia an ngai a nih. Ram palai sin thawtuhai chun mani ram tanghma seng ngaia thaw kan ni seng laiin, anni rawi hih chuh ieng kimah a tha a siein mani tanghma ngai chungchuonga hril kai an nih. An ram thuthlung chel- mipui rorelna (democracy), zalenna (freedom & liberty), inluok tlangna (equality) le inlaichinna (fraternity)- hai hi ram danga khaww to an tum ngat ngat laiin, an hlawkpui ding a ni phaww chun rawl insuona dinga khawm to an intm nawh. Ieng Baibil thuthlung am a na an zui tak ti indawn inla, an dawna chu saisa rup a tih.

Thil pakhat, ram dang neka an hlavtling chungchuongna chu, a ram mi, an that mahla le an thlahai tlawmte chauh ti naw chuh khawvel hmun hrang hranga inthawka hung lut, hnam tin le rawng chi tina mi, pem vavng an ni-a chuh 'American' ninaah lungruol taka an insung khawm vavng thei hi a nih. Chu nina chun inzawma le inringzona an lungriah a tu a, 'I am American' an ti chun mi dangin ngaisang le inza dingin an ring nghal a, thil dang hril sap ngaiin an hriet nawh. Eini rawi, abikin hmar-sak rama mihai lem chu ei hmung, ei khuo, ei biel, ei rambung ei hril vavng hnungah, 'A ni chun India mi i ni chu tie maw?' an ti khawmin, 'India ram sunga cheng ka na, Indian chu ka ni nawh' ei la ti taww taww. A'n dikna chin khawm a um. American-haiin 'American' an ti chuh USA khuo le tui nina (citizenship) neihai an nih. Eini rawiin 'Indian' ei thai chuh hril fie buoi khawm ngai loin Vai hmel le nungchang put, 'Indian' an ni tawp el.

Thil dangng peng san hla loin, ei thupuiah lut naww inla. Ei thupu chuh Niebuhr theulawzi 'Christian Realism' a nih. Chu chu eini tuolto tawng a ei sumphukah ei int umtir chun, "Takram le inzawm Kristiena" ti tieng a kaww. Sakhuo tin hin thuthlung inchuktir ei nei seng. Chu inchuktirna chu ni tin nun le khawsakna le inzawm le a taka hmang thei a ni le ni nawin thu a phur nasa hle. Beiseina le duthusam boruoka inhlieuna ding le takrama inthawka inbikrukna ding chauh hmang thei a ni chun hmang tlak lo sakhuo ning a tih. Miin ralthuom tha leh an hung run che a, kuttum ringawt hmanga lo dang i tum chun hne ngai naww ti nih. Inbuotsaina um loa tawngtai ringawt dang hne dinga inringna chu ringna piengsuol a nih. Niebuhr chun, "Justice is about using power to balance power of those not predisposed to recognize any limits on their self-interest" (Mani tanghma keina hin chin taww a nei ding a nih ti hre tum lohau kut chu dan kengkawtuhaiin indikna hmangin an khuop hlak) tiin a hril. An leh, President George Bush (Jr) hun laia suonlam bel chieng daww lo hmanga Saddam Hussein suot thla dinga Irak a run el khah ieng theulawzi am hmangin ei hril hlip tah ding? Tu chena buoina insersuon pei le Islamic State chen a hring suok leia insuosamma le inthanna tlung zozai hi tu am a na mawphurtu? Christian Realism le roreliuithaww pawliss hi hmang hin inzawlva a nei am? Hieng po po hi Republican President hnuoia thil tung vavng a ni naw maw? An hnung zuitu President Donald Trump kuta hin khawvel hi himin ei ring am? A nuom taww ka a chelek thei nawna dinga khuop theitia a ngai ni awm James Comey a hang ban tawp el hi ieng chelfung am chela a thaw ning a ta? Reinhold Niebuhr theulawzi chu hmang kher naw nih.

Thlangkawmna Kristien inti, Pathien pakhat inthawmhai lai khawm hin Baibil besana hmang, thuring tum tum, inpelsawl thet thet, mani thuring chu tha taka ngai seng ei um a. Chu chu chelfung taka ei hmang seng a nih. Ei ni tin nu le khawsakna leh ei thuring hin inzawmna a nei le nei naw ruok chu ei uksak lem nawh. Inthlang huna vote zavr le inchwak hi thil thieng a ni le ni naw Baibil besanin theulawzi ei nei tam? Mani ditthlangna hmanga zavr le inchw an ni a, danin a khap si naw chun iem ei hril thei? A lo khap a ni chun Baibil thangsana hril sap a ngai nawh. Nawchi ka lo zavr a ni chun, ka taksa ka nuom anga ka hmang a na, sawrkarah inzavr phalna lekha (licence) ka nei baww chun sawrkarah ka fiilim a, sienkhawm Baibilin inzavr a khap leini, chu laka chun ka fiilim thei nawh. Mi pakhatin sawrkar phalna neiin zu a zavr a, a dawn baww a, Baibilah zu dawn khapna a um baww naw leini a thilthaw chun a fiilim a nih. Amiruokchu, inruia buoina siem chu sawrkarin a remti naw ang bawkin Baibil khawmin tha a ti naw a, chuonga buoina siemtu chu dan anga hrem thei a nih. Sungkuo, khawtlang, vantlang le ram pum inrelbawlva dinga tangkai le pawimaw dan a um a, chuonghai chu sakhuo dan le inkal a um naw tluk a nih.

Hieng danhai hi ni tin khawksaknae ei chelfung a ni leini an pawimawna le inlaichinna hriet chieng a tha. Chuong naw chun ditthlangna le zalenna ei hmangnaah thil inkhaktuo a lei a ka, chu chun hremna dan a chaww tho a, tul loa intal buoi thei a nih. Ni khat el thia ka tawnhriet entirna dingin hang hril inla. Tuihaphai Diary-5 a ka thu ziek lem harsa ti pawlin mobile-ah tawng zamaw hmanga ka ring tan dinga an mi hung vauh bakah message dam an mi hung thawn baww a. Hienga that dinga invau hi Indian Penal Code chun "criminal intimidation" an ti a, a hremna khawm kum 12-27 cheng lun in (Jail) intang theina a nih. Nuom lang, mobile-a an mi vavna raww le an thu mi thawnhai chu Police Station hnai takah fepuin FIR file ka ta, a tukah Police-in an umna seng inthawkin va rut khawm an ta, Jail bang an zut rip ding a nih. Anni chauh ni loin, infui pawrtuhai (accomplice) chuh khawm zang bek naw nih. Thaw hriet tlawm leia chung thil chu (thaw an nih ti ka ring leini ka tawngtaipek taww tah lem a. Sienkhawm, simna chung hre loa an thaw zawm pei chun Grik tienami-a Sword of Damocles an ti ang khah an ring leh chuktuo zing ang an nih ti an hriet tha ngawt a tih. Paula thukhawchang ang khang suol chun Dan a chawwtho a, Dan chun kut a lek a, a ra suok chu thina a nih (Rom 7:5).

(Saturday, May 26, 2017, Delhi).



SUKDIKNA (CORRIGENDUM)

Khawmvar Magazine (Organ of the Evangelical Free Church of India) May 2017 Issue phok 8-na a 'NU HMANGAINA' ti thupui hmanga ka thuziek, Para 3 tlar 3-5-na lai a; "Ei suolhai intlan dinga ei Lalpa Isu'n Kross-a a tuor mek lai..." ti thu kha suksuol pawl a nih. Ei suolhai hi intlan tlaak a ni naw leini, "Ei suolnahaia inthaww min tlansuok dinga ei Lalpa Isu'n Kross-a a tuor mek lai..." tia tiem lem ding a nih. (Ka thuziekna Magazine hi thla khat dana suok chaw a ni leini ei Daily Paper-ah sukdikna ei hung siem el a nih)

Sd/- H.Zaneisang. Phone 9862065735. hzaneisang@yahoo.com

Bihar-ah ruo le tek tla leini mi 27 an thi

NEW DELHI: Bihar a chun zanikhan ruosur lei le tek tlain leini hmun hran hrana sietna tlungah mi 27 in thina an tuok. Hieng laizng hin Odisha a chun khawlum taluo tuorzonaw leia mihriem thina tuok 12 an tling tah.

PM rambung 4 sir dingin an zin suok ding

NEW DELHI: Prime Minister Narendra Modi chu vawisuna inthaww hin rambung 4- Germany, Spain, Russia le France hai sir dingin New Delhi suksan a tih. PM hi ni 6 zung cham dinga inzinsuok ding a ni a, a hmasa taknain Germany

KLO helpawl pathum man

AGARTALA : Tripura-a Gandhachera sub-division a chun zani hmasa khan Kamtapur Liberation Organisation (KLO) cadre pathum man an nih. Mana um hai chu Goutam Roy, Padma

Tarun Gogoi in CBI in-suitir dingin a phut

GUWAHATI: Assam Chief Minister Tarun Gogoi chun, Assam-a BJP sawrkarin Corruption dona kawnga hma a lak mek le inzawmin Assam Public Service Commission (APSC) hnuoia Cash-for-job scam a inrawlna niea intum Irrigation minister Ranjit Dutta le BJP leader dang Tuliram Ronghang hai chungthu chu CBI kuta pedaww dingin a phut. Hieng BJP leader pahni hai hi case-a inrawlna nei nia hrillang-a a hung um tan na chu March thlaa irrigation secretary Kujendra Doley man ni le inzawma hung inlang tan a nih. An chungna intumna um hi state sawrkar chun thupbo a tum a nih tiin Gogoi chun an tum baww. Doley hi Contractor pakhat kuoma pending bill pekdawvna dinga thamna Rs. 15,000 a lak laia man a ni a, a hnungin a Office chamber-ah Rs. 45 lakh dapdaww a ni bakah a chengnain Rs. 11 lakh dapdaww a ni baww a nih. (ENS)

LAKTAWI

ULFA (I) han bomb an sukpuok

SIBSAGAR: Assam-a Charaideo district-a chun zani hmasa zan dar 7:30 vel khan ULFA (I) cadre ni dinga ringhla han Teo-kghat hmuna Assam Gas Company Ltd. pipeline lai bomb an sukpuok a, sienkhawm thi le hliemna tuok an um nawh.

Hi Gas pipeline hi Tea gardens bakah power projects le upper Assam haia consumers hai gas pekna a ni a, siemthatna sin thaw mek a nih. (PTI)

E-Rickshaw driver vuokhlum

NEW DELHI: May 27, 2017 zan khan GTB Nagar hmuna E-Rickshaw driver Pramod chun Metro station laia inzun lo dinga student pahni a hril leia lungsenin pasal mi 14-15 vel han an vuokhravn a, damzo lovin a thi.

Tuolsungmi hai hril dan chun student pahni hai chun Metro station bul lai Zu dawnin an inzun a, chu chu Pramod hin a va hal a, hun iemanichen hunngah hieng student pahni hai hin an ruolhai van punin Pramod hi an vuokhravn el niin an hril. (ANI)

DBT lein Rs. 50,000 crore a save phak: Shah

NEW DELHI: Direct Benefit Transfer programme lein kum 30 liemta sung khan sawrkar thlungpui chun Rs. 50,000 crore vel a save phak niin BJP National President Amit Shah chun a hril. Aadhar le DBT Scheme thlungzawm (linked) hin ghosh beneficiaries tam tak a hnawl a, indiklo taka thil thawa um hai sukboin beneficiaries han an chanding ang tak direct-a an dawng thei ta leia hieng zat zat sum hi sawrkarin a save (hum) phak a nih tiin Shah chun a hril. (PTI)

Car kangah mi 3 a kanghlum

CHENNAI: May 27, 2017 zan khan Tamil Nadu-a Coast Road bula Kalpakkam hmuna Car pakhat a kang lein mi 3 a kang hlum. Hi Car kangin a kanglum mi 3 hai hi tu ham an nia ti hriet a la ni naw a, a motor number dugnzui chun Chromepet lai mi ni dinga ring an nih tiin Police chun an hril. (ENS)

Army Chief ni 4 cham dingin Myanmar-ah an zin

NEW DELHI: Army Chief Gen. Bipin Rawat chu ni 4 sung cham dingin zanikhan New Delhi suoksanin zanikhan Myanmar a pan. Myanmar a cham sungin Myanmar ram sipai thuoitu lien hai inhmupui a ta, an ram pahni haia security tiengpang thawtlangna thalem an nei thei dan ding le ramri venghinna tiengpang hriitlangpui a nih.

Myanmar le India ram hai hin ramri 1,640km a sei an nei a nih.

Maoist han teacher an that, Mobile tower an raw

PATNA: Maoist hai chun zani hmasa zan khan Jharkhand hmuna School teacher sinthaw Kalicharan Mahto (40) chu Police kuoma thu pesawngtu a nih tia intumin a chengnaina inthawm an va thuoisuk hnungin khavhnammah an kap hlum. Maoist hai hin Mobile phone Tower khawm an raw bawk.

Maoist hai hin Mr Kalicharan Mahto bakah a nau-pa khawm thuoit an tum a, sienkhawm a nuhmei chun an nau-pa chu thuoisuk lo hram dinga a ngen lein Kalicharan Mahto chau hi an thuoisuk a nih. (ENS)

J&K CM hlui Farooq Abdullah in President Rule puong dingin



SRINAGAR: Jammu and Kashmir Chief Minister hlui le National Conference (NC) chief Farooq Abdullah chun, Jammu & Kashmir-a buoina control a ni theina lampui umsun chu Governor/President Rule puong a nih tiin zanikhan a hril.

Governor Rule hi kan hriilmawi ngainaw a, kan ienglai khawmin kan dodal, sienkhawm tu

Electric power inru man hai kum 5 chen jail intangtir ta ding

AGRA: Uttar Pradesh chun electric power inru-kna kawnga amnesty programme a hawng chu June 15, 2017 hin a tawp ta ding a ni a, hi lei hin June 15, 2017 hnungtienga inthawm chu electric power inruk leia man hai chu kum 5 chen jail intangtir an ni ta ding bakah waiwhi man nawn hai chu kum 10 sung jail intangtir ni dingin state administration chun thutlukna a siem tah.

Uttar Pradesh-a hin electric power inrukna a hlur hle lein sawrkar chun hienganga power inrukna hi sukbo tumin theitawpin hma a lak a, official le thuneitu han inrawntlangna tha taka

Philippines President Rape Thua Fiemthu Thaw



MANILA: Philippines simtieng thlierkar Mindanao biela Muslim helpawlhai tukdawlna dinga Martial Law puongtu President Rodrigo Duterte chun, sipaihai cho phurna dinga fiemthu thawin, sipai pakhatin nuhmei pathum in suolliu a nih chun, pakhat maw chu keiin phur ka ti, a ti lein kil tina inthawkin sawisêl le dem a hlâw nasa hle.

Khawhnungah, fiemthu a thaw a nih thu hriilin, helpawlhai dona kawngah sipaihai chu theitawpa thaw a, dan le thupek a um nawk theina ding an thaw taphawt chu a ding ting thu le, thaw suol a um chun aman maw po po a phur el ding thu a hril nawk a. Sipai tukhawm nuhmei chungma mawinaw taka chang (suol) chu an dawî naw ding thu a hril nawk bawk.

"Nuhmei in suolliu a nih chun keiin lunginah khum ka ti chet" tiin a hril a. Chu zovah fiemthu, "In insum thei hlawl naw a, pathum in lo suolliu a nih chun, keiin pakhat ai tum ka ti" tiin a sipaihai ta dinga an pek zo zie tarlangna dingin a thuhriinaah a hril niin a office transcript chun a zieklang.

Mindanao thlierkar khawpui Marawi ah Muslim helpawl han Islamic State indin an tum dangna dingin Army han operation nasatakin an thaw a. Khawmi tamtak an tlan suok tah bawk a. Thla hni sung Martial Law a puong a nih. "Sipai ti lo tukhawm silai chawi taphawt chu man anawleh kap hlum pei ding an nih" tiin thu a pek a nih. President Duterte hi fiemthu thaw ching tak a nih a. Kha hma khawm kham, President election a hrât tuma fiemthu a thawin tamtak lung a suksena, dem a hlâw hle a nih. Kum 1989-a

CBSE Class XII result puong: Pass percent 82



NEW DELHI: Central Board of Secondary Education (CBSE) hnuoia Class XII Exam, 2017 result chu zanikhan puong a ni a, Noida hmuna cheng le Amity International School, Noida-a kai Ms Raksha Gopal chun marks 99.6 percent hmuin topper a nih. Bhumi Sawant chun marks 99.4 percent hmuin pahinna a ni a, Aditya Jain le Mannat Luthara hai chun marks 99.2 hmuin pathumna a nih. Pahinna le pathumna hai hi Chandigarh mi vawng an nih.

BSNL in tuta inthawm kum 2 hnungah satellite phone service

NEW DELHI: Sawrkar thlungpui hnuoia um BSNL chun khuorel sietna le thil dang dangna buoina um chang khawma harsatna um loa thu inhrietpaw zung zung a ni theina dingin India ram hmun kikhhar tak chena khawm hmang thei dingin tuta inthawm kum 2 hnungah Satellite phone service tan a tum niin BSNL Chairman le Managing Director Anupam Shrivastava chun PTI a hril.

Hi thil le inzawm hin International Maritime Organisation ah application pek a nita a, hun iemanichen chu la aw a ta, thla 18-24 hnungah chun a phase ang zawngin satellite phone service hi tan theiin a hung um ta ding a nih tiin Mr Shrivastava chun a hril



SAT service hmangin satellite phone service tan a ta, hmasain Government Agencies hai pek phawt ning an ta, phase a thenin mipui hai hmang thei dinga service sukliein pei ni dinga hril a nih.

Tuhin India rama chun Videsh Sanchar Nigam Limited, tuta Tata Communications Ltd) a inthawka licence lasawng Tata Communications chun Satellite phones service a pek a, sienkhawm TCL satellite phone service hi June 30, 2017 a inthawm sukdwep le BSNL tienga sawnlut vawng a ni ta ding a nih. Hiengang service hi India ramah 1,532 a um mek a, a hmangtu hai laia a tamlem chu security forces an nih. (PTI)

KAN THEINGHIL THEILO

KAN PA




Lienkung Pudaite
(14-4-1932 to 29-02016)

Van khawpui I min lawisan ni champha vawikhatna a hung tlung in I sung-le-kuo le nauhai popo hin kan theinghil phal naw che.

- I nuhmei le nauhai

LAWMTHU HRILNA



Hun iemanichena inthawm ta khan Pile natna ka nei a. Sawt tak tak inhnawmain hun ka hmang a, a chang changin thisen a suok a, ka tawl a hung lienin a hung puom a, ka kawng a hung na a, Gastric a hung um a, ka phing a hung inri rak rak a, ka taksa a hugn chauin ka hung cher deu deu a. Ka beidawngin MV Azad Phusam ka pan a, hun iemanichen a mi enkawl a, tuhin chu ka dam fel tah.


Hi lei hin ka lawm hle a, hi chanchinbu hmang hin ka lawmthu MV Azad Phusam chunga ka hung hril a nih. MV Azad Phusam hi nitin 8AM-4:30PM inkar sungin Centre Road (Oop. ICI Church, ICI Road) Hiangtam Lamka, CCPur-ah pan thei le Mobile Phone Nos. 8014025567/ 7628890261 haiah biekravn thei a nih.

Lawmthu hriitu, Sd/-Goulenthom Rengkai

PIGROW Tablet

VAWK INTHANGNA DAMDAWI

I vawk zawr hun tingna dingin kum khat nek tam nghak ngai tanaw nih.



A PEK DAN DING:

- * Vawk pakhatah nikhatah mum 20 (zingtieng mum 10 le zantieng mum 10) pek ding.
- * Box khat ah mum 600 a um a, chu chu thlakhat sunga a fakzo ding a nih.
- * Rawt phita pek in fak awlsam an ti lem.

INCHAWK THEINAHAI:

1. Hmingi Bethel, CCPur # 8414852391
2. L.K. Screen Printing Lighthouse Lane, CCPur
3. Pet Care Centre, Tiddim Rd. CCPur.

Order tam dan dungzuiin HOME DELIVERY khawm kan thaw thei.

JKLF Chairman Yasin Malik man

SRINAGAR: Zanikhan JKLF Chairman Mohammad Yasin Malik chu Jammu and Kashmir a Maisuma hmuna a chengnainah Police han an man a, Srinagar Central Jail-ah an thun. JKLF Chairman hin zani hmasa khan south Kashmir-a Pulwama district-a security forces hai le inkaptoona kap hlum Hizbul Mujahideen helpawl Sabzar Ahmed Bhat le Faizan Muzaffar hai chengna in a va sir nia hril a nih. Mr Malik bakah Hurriyat Conference Chairmen Syed Ali Shah Geelani le Mirwaiz Umar Farooq hai chun Hizbul helpawl pahni kap hlum an nina le inzawm hin Kashmir valley-ah ni 2 sung shutdown an puong a nih. (Kash)

SL tuilien leia thi mi 151 an tling tah

COLOMBO: Sri Lanka-a chun sansuokna sin thaw pawl han mithiruong an hmu belsa nawk lein tuchena tuilien le

mimkei tlung leia theina tuok chu mi 151 an tling ta bakah mi singtel chengna ding nei lovin an um pha tah.

diation detect dinga South China Sea chungma puong chu China fighter SU-30 pahniin an lo va nangchil tah bawk.

South China Sea hawsakna Trillion 6 neka tam ding hi an inchu seng a, tuipui zau taka thuneina lientak nei tum eng an nih lein North Korea nuclear program bakah South China Sea thu hi indona suksok thei ding dang pakhat chu a nih. Indopui 2-na hun lai chu Japan ti bak tukhawma an la hmang bek lo hi rambungah hma an hung sawn peia a pawimawna le hlutna an hung hmu pei tah lein 'thununtu' ni an nuom pei tah a nih.

China chun artificial island le sipai hmunpui khawm a lo siem der an tah. Suotieng milien chu a la lein pei a nih.

Trump-in Climate Change Agreement suoksan tum



WASHINGTON: US President Donald Trump chun, a news agency ringzo tak Axios le a ruoltha hmoiha a hril dan chun, khawvel rambung 195 han Climate Change tuah Global Warming sukhnoina dinga inremna an ziek Paris Agreement chu a suoksan ding niin, Irinini khan ringum tak tak thudawngna pathum a inthawka an thu hriet an hril.

Hienglai zing hin Irinina tuka Twitter-a a post dan chun, hung tlung ding kar thara khin chu Climate Change chungchanga a ngaidan le a ngirhmun ding chu a puong fel tah ding niin a ziek. Hi thua hin White House chun comment iengkhawm a la siem nawh. Thutlukna siemna dinga thang ve thei mi pakhatin Reuters a hril dan chun, Climate Change thua President Trump-in thutlukna a siemna ding le inzawmin company lien tak tak le Energy company lien thuoitu-hai chun meeting sawng thum lai zet an lo nei tah niin a hril. America sukropui nawk tuma Company hai thil siem sukpong tum a nih lein 'thilsiem sukt-lawm' a climate change do chu Trump policy a ni naw el thei.

Chinese Fighters han US enthlatu vuongna dang



HONG KONG: Khawvel boruok suklumtu le Indopui 3-na suksuok el theina ding hmuna ngai South China Sea laia boruok le thil umdan chu a ni telin a danglam pei a. North Korea nuclear ralthuum le missile thubuoï zovah China le US tui sipai le boruok sipaihai kar thu a nih nawk tah.

US Navy official haiin an hril dan chun, Chinese vuongna (fighters) pahni chun South China Sea chungma US Navy surveillance vuongna chu an lo dang buoia, hun iemani chen chu a sin thaw thei lovin iengkhawm hmu thei lovin an siem niin a hril. Chinese indot vuongna (fighter) hi US enthlatu vuongna P-3 Orion a inthawka yard 200 (meter 180) a hmoiha a hung vuong/dang niin a hril.

Report hril dan chun, US enthlatu vuongna P-3 Orion hi international airspace Hong Kong a inthawka Km240 (Mel 150) vela hlaa vuong a nih. China fighter haiin an hung dangna hmun hi an ramri sung an nawh a, international airspace a nih, an thil thaw dan hi a him naw hle, a professional naw hle, tiin a hril bawk.

Little Miss Universe ah kum 12 mi Padmalaya Nanda



CUTTACK: May 31, 2017 a inthawk Georgia, US-a Little Miss Universe beauty pageant um dingah Odisha teirawl Padmalaya Nanda (12) chu India ram aiawin thang a ti. Ms Padmalaya hi India ram aiawa Little Miss Universe contest a thang ding thlang-suokna dinga contestants 16 um hai laia inthawka thlangsuokna dinga...

Melania Italy ah Jacket Rs. 32 Lakh Man Leh

SICILY: US President nuhmei Melania Trump (48) chun, a pasal Donald Trump foreign trip hmasatak an zinna a zui thei leia lawmum a ti thu hrilin, tuta tum an foreign inzin chu ama ta dingin, First Lady a nina anga a hmasatak a nih bawka inchuk a hau hle niin a hril.



Melania hi a pasal Trump nek'in a hmel-thatna le an cheina nal thei leiin hril a hlaw lem a, mi mit a lak lem baw. An inzinna chu inhawi a ti hle thu hrilin, "Khuol inzinna hlawtingtak niin ka hriet a, thil tha tamtak intun ngei a tih ka ring. Ka pasal chun kan ram le khawvel ta dingin thei tawpin sin a thaw a, ka suong hle a nih. Hi inzinna hi ka ta ding chun, First Lady ka nina anga ka tawnghriet hmasatak a nih a, ropui ka ti" tiin a hril.

Angelina Jolie le Pitt Nau Shiloh Kum 11 Tling

LOS ANGELES: An Pa Brad Pitt leh an inthe an In thar Mansion ah an insawn lut huong le, Mothers' Day khawm a nauhai leh an hmang zo hnungin Angelina Jolie chun Nigani khan Brad Pitt leh an nau hmasatak Shiloh Jolie-Pitt kum 11 a tlingna lawmin Disney World ah a unau danghai leh a lengpui tawl a, inhawi an ti tlang hle.



Shiloh Jolie-Pitt hi May 27, 2006 khan Namibia, Swakopmund ah a pieng a. A pieng tira a hming chu Shiloh Nouvel Jolie-Pitt ti a nih a. Khawhngah Shiloh Jolie-Pitt an ti nawk a, ko duotnaa chu Shiloh ti vawngin an ko. A nu le pa a lak kawp lein Brad Pitt hmai tlang ah a nu mitmeng le hner a put a. Hmai cheng kaka a sam eng thalin, pa deuh khak el a nih.

remote control Car hai khalin hun an hmang. Angelina chun, "Inhawi in tih am?" tiin an dawn pei a. A nauhai hlimna ding hi a ngai pawimawtak a nih ti hmu thei dingin a um tiin dawr nghaktu Clerk chun a hril. Shiloh hi a ruolhai, a nu film siem "First They Killed My Father" a naupang a changpuihai leh khawm an inhmuh a, hun an hmang tlang baw.

Duchess of Cornwall, Camilla'n Lal sungkuo nun a hril

LONDON: Prince Charles nuhmei Duchess of Cornwall, Camilla chun Britain lal sungkuo insunga khawksak chu ring nek'in a hau a lo intak a, sawl a um niin a hril. Prince Charles le an innei hnunga a vawikhat hrilna dingin The Sunday Mail le interview an neina ah, vavi khat khawm Queen (lalnu) ni tumna/nuomna lungril a nei naw thu le harsatna a tuok tamtakhai chanchin a phawrlang.



Kum 70 tling vang tah Camilla chun lal insunga ni tina thaw tulhai thawna kawnga taksa le lungril phurrikhai a hrillang a. Lal insung sin a tam dan chu, "Iemani chang chu zingkar ei hei tho a, vawisun chu thaw thei, zo nawng ka ti" ka ti chang hi a tam. Hun intep tak le thaw ding tamtak (tight scheduled) kara hunbi hnawt chu sawl um ve tak a ni thu a hril a. Mi narân anga midanghai le titi le in pawl mei meina ding na um naw bawk niin a hril. Camilla chun, nu hrattak

hin Prince Charles hi a chang chu a nina neka ropui le insangah dam an umtir hlak a nih. Lal insunga thil le tuchena an nunah lungawi nawna ding a nei naw thu a hril lai zingin Charles le an innei hma, 1970s, an inleng lai huna a nun ruok kha chu "harsa tak" niin a hril. Iemani lai tak lem kha chu, kum khat vel chu mani ina um zing sia lungina intang an a ni thu a hril a. A hun tamlem chu lekhabu a tiem hlak. Hun kha inhawi taka hmang kha a tum reng reng hlak niin a hril a. Harsatna thenkhat chu innui liem ela dam/tha khawm a

um niin a hril. Lalnu bielnu a nih ti an hriet a inthawkh khan a nun kha a zalen ta naw em em a, narân taka um kha a harsa tah niin a hril. A chanchin hre nuom le thilak lak nuom ringawta a ruok an In le compound vela photographer lut ru le inchan ru ni tin mi 200 vel an um zie niin a hril. Khang lai huna khan, tuok suok khawm a ta dingin an tak a. "Ni tin el kha a rik tup a nih" tiin a hril. Amiruokchu, hringnun ah harsatna tamtak um hlak sienkhawm, positive person ni chun thil tamtak thaw thei a nizie a hril. Ama khawm beiseina nei tlat mi (positive person) niin an hril. "Mi tamtak chun noa tui a 'chenve ruok' an hmu a, thenkhat chun a 'chenve sip' an hmu hlak. "Beiseina nein, hmating a tha zawnga thil thlirin un hi hmang pei ding a nih" tiin a hril. Camilla hi July tha khin kum 70 a tling ta ding a nih.

Ben Stiller le Christine Taylor hai an inthe



LOS ANGELES: Nupa inrem tak le hlim thei tak ei tihai khawm hi thenkhat chu thil hotein a sukbuoi hlak a. Thenkhat chu harsatna le rinumnaahain a sukrhat baw hlak a. Thenkhat chu a san bo derin 'inthat' the khawm an um a. Hollywood le le sahai lai chu an ram California danin kum thum chen innei tak chun nuom chun "peksachang" or 'inthat' thei a nih ti a um lei amanih ding nupa inthe mei nei an tam em em.

Hollywood nupa inngei pawl taka hriet, kum 18 zet innei taa nau nunghak khawm ngaklakte pahni le tlanglakte pakhat nei tah, film tam taka khawm chang dun tah, Ben Stiller le Christine Taylor hai chun an pahni hmanga thusuok siem in 'inthe zai' an rel tah niin an hril. Ben (51) le Taylor (45) hai thusuok chun, "Hmangaina le inzatawanna insangtak nei zingin, kum 18 sung inngei taka kan innei hnungin, inhrietthiemaawna iengkhawm um lovin inthat the zai kan rel tah a nih" tiin an hril a. ET an hril dan chun, "Kan thupui tak chu nauhai thangurola tha taka enkawl tung pei ning a ta. Media hai khawmin kan mimal nun min zapek dingin kan ngên ngên" tiin an hril. Ben le Christine hi 1999

COPA DEL REY FINAL REVIEW: Barcelona chun Alvares hai 3-0 a hnein cup an lak

Barcelona hi La Liga tieng lungril nat thlak takin pahna an ni a, Champions league an thaw tha naw bawk a, ancahu Copa Del Rey an la hung lak hrim hrim hi an ta ding chun lawmum tho tho a tih. In-rinni zan Final inkhelah Barca ta dingin minute 30 naah Lionel Messi chun goal hmasa a thun a, minute 3 a liem nawk charin Alaves tieng chun Theo Hernandez hmangin an goal bat an hung rul a. Half hma char minute 45 naah Neymar chun goal khat a hung thun nawk a, chu zo char first half hun belsah Francisco Alkacer chun Barca goal thumna a hung thun nawk a. First half sun-gin hi inkhela goal um po po an thun hman vawng a nih. Barca hin inkhel an



thunun a, ball possession khawm 65% tawp an nei phak a nih. Barca haiin hi cup an lak hi a zawna vawikhum an lakna a ni tah. An manager Lui Enrique in Barca hi season thum a enkawl na ni ta a, hi sung hin trophy pakuo tawp a lakpui hman a nih. Hi inkhela hin Messi a che tha hle a, an manager khawma an pak hle. Ama chun Messi chungchong hieng hin a hril. 'Ama hi mi danglam bik khawvel pu-tieng mi ni hiel awm a nih,' tiin.

FA CUP FINAL REVIEW: Alexis Sanchez le Aaron Ramsey hai goal khat ve ve hmangin Arsenal chun Chelsea an hne

Football Association Cup Final chu Inrinni zan khan Arsenal le Chelsea an inkhel a. Arsenal chun a vavi 13-na dingin 2-1 hnein Cup an lak. Inkhel tan hlima inthawk minute 4 na chauh goal hmasa a thun ngal a. Half chenah goal dang a lutsap nawh. Half zo hnung khawm goal a lut el nawh a, minute 76 naah Diego Costa chun Chelsea ta dingin an goal bat a hung rul. Chu zo minute hni a liem charin Arsenal chun Aaron Ramsey hmangin goal khat an thunsa a, Chelsea chun rullet zo ta lovin Arsenal an champion ta a nih. Chelsea vangduoi hri hri'n minute 68 naah Vic-



tor Moses chun red card a hmu a, an tlawm lem hi an thawhla ta a nih. Inkhel an inhne tawh hle a, Arsenal hin ball possession an hau lem met. Ramsey hin 2014 khawm khan FA Cup final thovah Hull City lakah goal a lo thun ta bawk. Arsenal Man-

ka ti hle, tiin a hril baw. Hi result dungzui hin Arsenal hin Chelsea hi FA Cup Finalah vawihni an hne ta tina a nih. Sanchez hin tuhin Arsenal ta dingin inkhelna chi dang dangah a zawnin inkhel vawingaah goal a la thun vawng a, hieng ang hi a vavikhat tuokna a nih. Diego Costa goal thun hi tuta season sunga a goal thun 22-na a ni a, Chelsea-a a um sunga dingin a la thun rawn tum tak a ni bawk. Hratna goal thuntu Ramsey chun Cup an lak le inzawm hin an manager chu Arsenal la suoksan lo dinga a dit thu a hril.


Michael Carrick chu kum khat dang Old Trafford-a um dingin Contract a ziek



Kum 35 ni tah, Manchester United player hlun Michael Carrick chun Old Trafford-a la cham sunzawm dingin kum khat dai contract thar a ziek. Ama hin kum 2006 khan Tottenham-a inthawkin Old Trafford hi £18.6m in a zawm a. Vawisunni chen hin vavi 458 an khel hman ta a, goal 24 a thun ta bawk. Ama hi English player-hai laia hlawting pawl tak a nih a. Cup lak thei po po deuthaw la tah a nih. Ama le Wayne Rooney char hi English Player-hai laia Premier League, Champions

Transgender Model Andreja Pejic a nal hle

CANNES: Eini lai khawm tamtak hriet ding um ve tah, khawvelin ngaia a nei vang vang tah, Pathien thilsiem sukdanglama mihriem thil siem 'transgender' (nuhmei-pasal nuom lem lema in-siemna - nina inthleng) chun hmun a chang insang deu deu a, khawvela inthelarna insangtak pakhat Cannes Film Festival Red Carpet ah chen pholang a ni tah. Tulai hnaia GQ Portugal magazine cover ah, khawvela pasal nuhmeia insiem model (transgender model) hmasatak inpholang Andreja Pejic (25) chu tuta tum 70th Cannes Film Festival, amfAR Gala Red Carpet ah a hung inpholang ve a, a nal hrep nawk ngal. Tukhawma a pasal nina kha awi ta naw nih hai. Nunghak hmetha tak a nih tah.



Kum 25-a upa Andreja hi model danghai naw ang takin umzie nei deu event haia chauh an pholang hlak a. Tuta an pholang khawm hi HIV/AIDS dona amfAR 24th Cinema Against AIDS Gala a nih. A zen nalzie suklangna dingin a figure le intiet char 'figure-hugging dress', taksa rawng innem thap, khup chen, dar inhawng puonbil le zakuo inkawp a hak a. A bra hrii dum an lang thei a, a ban le kehah zen zat leh. Hand bag khaiin high

heels bunin a sam eng thal nam zata khuiin, mitmeng sexy hamin hner sen iem iemini mi a hei mel chu val tamtak chu tlu duoi duoi ngei ngei an tih. Andreja hi thla hmasak khan GQ Portugal cover ah an lang a. Pasal nuhmeia insiem model, magazine cover hluotu hmasatak a la nih a. "Mipui laia ka kut mi chel nuom nawthui khan la hre pei in tih" tiin nal takin nuhmei tak tak a ni takzie a tarlang a. "Hmangaina indiktak ka hung hmu suok ve hlima pasal mi ngaisak nawthui po po chunga phuba la lakna a nih" tiin nunghak hmethatak a nizie a hung suklang a nih.